



गुरुदेबनि समाज फोसाबनाय आदब सोलो (Social reforming techniques of Gurudev)

अजित बर' पि.एइच.डि., डि.लिट.

गसाइगाउ बि.एड. फरायसालिमा, गसाइगाउ, कक्राइर, बि.टि.आर., आसाम

गुबै बाथ्रा

गुरुदेब कालिचरण ब्रह्मवा बर' समाज फोसाबनायनि सासे बनजार हमगिरि। बिथाडा इं 20थि जौथाइनि 2थि जिथाइयाव जुरिनानै बर' समाजखौ थुनलाइ आरो दोहोरोमनि बिजोंजों फोसाबनायनि जा मोनसे जांख्रिथाइ लाबोदोंमोन बेनि गोहोमा बर' महासनमिलनीनि जोहै बर' थुनलाइ आफाद आरो बर'नि गुबुन गुबुन आफादफोरनि सायाव जोबोरै गोग्लैदों होन्नानै मोनदांनो हायो। इं 20थि जौथाइनिनो 3थि जिथाइनि 1921, 1925 आरो 1929 माइथायफोराव खुंजानाय बर' महासनमिलनीनि फारियै 1थि, 2थि आरो 3थि जथुमानि गेजेरजों माबोरै समाज फोसाबनाय आरो फोजौखांनयनि थांखि नाजावनाय जादोंमोन आरो मावफुंनो लानाय जादोंमोन बेनि सोमोन्दै बे सावरालाइयाव सावरायनाय जादों। मख'जाथावदि, बै जथुमाफोराव गोबां मख'जाथाव थांखिफोर लानाय जायो; जेरै- बर' महासनमिलनीनि जथुमाखौ बोसोरफ्रोमबो खुंनाय जाथों आरो बे बोसोरसालिया जथुमायाव आयजोफोरनिबो आयदा लाफानाय जाथों; स्कूल आरो कलेज फरायसाफोरनि मुलाम्फानि थाखाय जथुमायाव बोसोरफ्रोमबो लाइसि दिहुननाय जाथों; गोबां गुदि फरायसालि गायसननाय जाथोंसै आरो हौवासा-हिन्जाउसा गासैखौबो फरायसालियाव हगारहरहोनाय जाथों; बर'फोर अमा फिनाय हुदाखौ होबथानाय जाथों; गासैबो बर'फोरा ब्रह्म दोहोरोमखौ आजावनांगौ होन्नानै खावलायनाय जाथों; नायनो मोजां हिन्जाउफोरखौ बोनानै हाबा खालामनायखौ होबथानाय जाथों; जौ संनाय आरो लौनायखौ होबथानाय जाथों; दाउ-फारौ हाथारनानै इसोर सिबिनाय खान्थिखौ होबथानाय जाथों आरो ब्रह्म दोहोरोमखौल' आजावनाय जाथों; बर' हिन्जाउफोरा हाथाइ जानायखौ होबथानाय जाथों; बायदि बायदि।

मादा सोदोब: गुरुदेब; कालिचरण ब्रह्म; बर' महासनमिलनी

1. जागायनाय

गुरुदेबा सासे दोहोरोम आरो आध्यात्मिक गुरु जानायनि अनगा सासे गोख्रो समाज सिबियारि, समाज मोजां मोनग्रा गोख्रौं मावथिमोन। बिथानि गोथौ दोहोरोमारि आरो आध्यात्मिक सानथौनि थाखायनो बिथांखौ ओन्सोलनि रायजोफ्रा इं 1906 माइथायाव गुरुदेब होन्नानै मान होनो लादोंमोन आरो महात्मा गान्धीबादि गेदेर आत्मा थानाय बयखौबो अनसुला, गुवार गोर्ले गुरुदेबखौ इं 1934 माइथायाव मेच गान्धी होन्नानै मान होनो लादोंमोन। बिथानि जोनोमा इं 1860 माइथायनि 18 एप्रिल खालाराव जादोंमोन आरो रुंसारि जादोंमोन इं 1938 माइथायनि 8 मे खालारखालि। समजों खाब जानानै सोलिनो नाजानाया जौगानायनि इसारा। सम आरो थासारिया सोलायसुला, थाथ'नाय गैया, सोलायखागोन। नाथाय समजों गोरोबनो हायैया समाज, आफाद आरो जायखिजाया फसंथानल' नडा सुबुनि जौगानाय, आब्रुथि बायदिफोरावबो गोहोम गौग्लैयो।

समजों खाब जाहोनानै गुरुदेब कालिचरण ब्रह्मवा समाज फोसाबनो जाय आदब आरो सोलोजों जांखिखांदोंमोन बेयो बर' समाजनि थाखाय जोबोरै गोसो खांथावना सम। बिथानि दैदेनगिरिनि आदब आरो सोलोआ रुजुजायैमोन। मोनफ्रोमबो बिथिडाव बिथाडा सोलायनाय आरो जौगाहोनायनि थांखिजों गावखौ बावसोमदोंमोन। समाज फोसाबनो *बर' महासनमिलनी* मुंनि आफाद दानानै जथुमा खुंनायनि गेजेरजों समाजाव माबादि गोहोम खोख्लैनो हादोंमोन बेनि बागै गाहायाव सावरायनाय जाबाय।

2. बर' महासनमिलनी जथुमा खुंनाय (1921)

बर'फोरखौ खौसे खालामनानै बर'नि समाजखौ फोसाबनाया गुरुदेब कालिचरण ब्रह्मनि गाहाइ थांखिमोन। गिबियावनो ब्रह्म दोहोरोमखौ गुरुदेब कालिचरण ब्रह्मवा फोसावप्रोदोंमोन। ब्रह्म दोहोरोमनि गेजेरजों बर'फोरनि साननाय आरो मावनाया सोलायनो आरो जौगानोबो हादोंमोन।

गुरुदेब कालिचरणा ब्रह्म दोहोरोम फोसावनानै बर'फोरखौ सांग्रां खालामामोनब्ला रावबोआनो गैयामोन बै समाव। बेनिखायनो गुरुदेब कालिचरणनि सानथौवा (आदर्श) बाख्नायजाथाव।

गुरुदेब कालिचरणनि साननाय आरो मावनायखौ मिब्थिनानै रुपनाथ ब्रह्म, सतिश चन्द्र बसुमातारी, पद्म श्री मदाराम ब्रह्म, नेपाल चन्द्र ब्रह्मचारिमोना बर' समाज फोसाबनायनि फारसे सांग्रां जादोंमोन।

इसोर सिबिनाय, हाबा खुंनाय, नखर आरो समाजनि हाबा मावनायाव, जौखौ गोनांथार सान्नानै बाहायनाय, बोनानै आरो खावनानै जुलि खालामनाय, अमा फिसिनाय, लिरनो फरायनो रोडै, दोहोरोमनि फारसे सांग्रां नडै – बेफोरनि थाखायनो बर'फोरा मुगैजादों, जौगानो हायाखै, बेफोरनि फारसे सांग्रां जानो हादोंमोन। बेफोरखौ होबथानानै बर' समाजखौ फोसाबनो गुरुदेब कालिचरणजों हेफाजाब होनो जान्जि खाफ्रादोंमोन गोबां गोरों बर' सेंग्राफ्रा।

गमामायैनो इं 1921 माइथायाव गुरुदेब कालिचरणनि दैदेननायाव बर'फोरखौ खौसे खालामनाय थांखियै *बर' महासनमिलनी* मुंनि मोनसे जथुमा खुडो। बे जथुमाखौ खुंदोंमोन गसाइगाउ थानानि सिडाव थानाय भाउरागुरि मुंनि दरसे बर' गामियाव। बे *बर' महासनमिलनी*खौ खुंनो थाखाय बान्जाय आफाद

दानाय जादोंमोन। बान्जाय आफादनि बिबानगिरिफोरा जादोंमोन- बोसोनगिरि गुरुदेब कालिचरण ब्रह्म, आफादगिरि जदुनाथ खाख्लारि आरो नेहाथारि रुपनाथ ब्रह्म। लोगोसे, सोद्रोमाफोरा जादोंमोन- बिर नारायण मण्डल, जामादार ब्रह्म, सतिश चन्द्र बसुमातारी, बिजयसिं ब्रह्म, उन्दै कालिचरण ब्रह्म आरो मानसिं ब्रह्म।

बे जथुमायाव गोजान गोजान जायगानि बर'फोरा खौसेयै बाहागो लाफैदोंमोन। बर' समाजखौ खौसे खालामनानै जौगाहनो थांखि लानानै खुंनाय बे जथुमाया जोबोद मेहेर गोनांमोन। मानोना बे जथुमायाव सेंग्रा-सिख्ला, बोराइ-बुरै गसिबो ज जालायनानै सानज्जलायनायनि मोनसे खाबु दंमोन। बे जथुमायाव समाजारि, सोलोंथाइयारि रांखान्थियारि आयदाफोरनि सायाव गुवारै सानज्जलायनानै गाहायनि थांखिफोरखौ खौसे मददजों आजावो।

थांखि नं 1 : बर' महासनमिलनीनि जथुमाखौ बोसोरफ्रोमबो खुंनाय जाथों।

थांखि नं 2 : महासनमिलनीनि बोसोरसालिया जथुमाखौ खुंनो मोनसे मावफुं आफाद दानाय जाथों।

थांखि नं 3 : बे बोसोरसालिया जथुमायाव आयजोफोरनिबो आयदा लाफानाय जाथों।

थांखि नं 4 : स्कुल आरो कलेज फरायसाफोरनि मुलाम्फानि थाखाय बोसोरसालिया जथुमायाव बोसोरफ्रोमबो लाइसि दिहुननाय जाथों।

थांखि नं 5 : गोबां गुदि फरायसालि गायसननाय जाथोंसे आरो हौवासा-हिन्जाउसा गथ'फोरखौ फरायसालियाव हगारहरहोनाय जाथों।

थांखि नं 6 : हाबा खुंनाय आरो गुबुन-गुबुन समाजारि फोर्बो फालिनायाव जौ बाहायनायखौ नागारनाय जाथों।

थांखि 7 : फिसा हिन्जाउ हाबा हरनायनि थाखाय पन टाकाखौ 51 रांल' लानाय जाथों आरो सोरबा बेनि बारा लायोब्ला जुरिमाना फोनांनानै बारा लानाय रांखौ होफिननाय जाथों।

गुरुदेब कालिचरण ब्रह्मनि दैदेननायाव गोजौनि थांखिफोरखौ आजावनाय जादोंमोन। बेफोर थांखिफोरखौ राइजोफोरनो गुवारै बेखेवनानै होयो।

इं 1921 माइथायनि 21 जुलाई आफादनि गेवलां मेलावनो गोबां राइजोफ्रानो बाहागो लाफैदोंमोन। बर' समाजखौ फोसाबनो थांखि लानानै खुंनाय बे सेथि बर' महासनमिलनीनि गोदान मुंखौ खोनानानै गोबाडानो गोसोआव रंजानाय आरो थुलुंगा लानानै ज ज बाहागो लाफैदोंमोन। गेवलां मेलाव गाहाइ आलासि महरै बाहागो लानानै गुरुदेबा ओरैबादि बुडो-

“दाउसा-फारौ हाथारनानै इसोर सिबिनाया महाफाफ जायो। दाउसा-फारौ होयो, थैया रानलाडो, खर'-मोदोम मानसियानो जायो, बोर बिनाबो मोना जायो, निदान आफोदावबो इसोरखौसो सिन्थियो, जायहा जेसे मोदाइ होयो बिहा निदानानो जोबनो गैयासो जायो।”

थांखि नं 3नि गेजेरजों गोदोसोनानै थानाय बर' आयजोफोरखौ जौगानाय फारसे आवगायबोनो थुलुंगा होनाय जादों। बर' आयजोफोरा दानाय-लुनाय, संनाय-खावनाय, मोसानाय-खननाय, गायनाय-फुनाय मोनफ्रोमबो आयदायाव जोनोमजों फैफानाय माखासे जर'खा गुन आर्जिखायो। बैफोर गुनफोरखौ थुलुंगा होनांगौनिल' गोनांथि दं। थांखिनि गेजेरजों आयजोफोरखौ गोहोगोरा खालामनि थुलुंगाया रोखायै बेरखांदों।

थांखि नं 4नि गेजेरजों फरायसाफोरनि थुनलाइयारि हारिमु आरो सोर्जिलु गोहोखौ थुलुंगा होनायनि गेदेरथार बिथांखि। लोगोसे राव, थुनलाइ आरो सोलोंथाइ जौगाहोनायायनिबो राहा लामा।

थांखि नं 5नि गेजेरजों बर'फोरखौ सोलोंथाइयाव जौगाहोनायनि थुलुंगाया रोखायै बेरखांदों आरो फ्रि आरो कम्पालसरि गुदि सोलोंथाइनि गोनांथि सानखांनो खाबु होनायजों लोगोसे गथ'फोरखौ गोहोगोरा खालामनायनि बिथांखिया रोखायै बेरखांदों।

थांखि नं 6नि समाजनि हाबा-हुखाफोरखौ आब्रुथिनि गेजेरजों खुंफुनायनि राहा लामा दिन्थिनायजों लोगोसे आध्यात्मिक गियान थुलुंगा होनाय जादों।

थांखि नं 7नि गेजेरजों हिन्जाउ माहारिनि फारसे रैखाथि होनायजों लोगोसे मान होनाय जादों। बैफोर थांखिफोरा दिनैनि गोदान समाजाव थारैनो जौगानाय आरो आब्रुथि लाबोनायनि फुंखा।

3. नैथि बर' महासनमिलनी खुंनाय (इं 1925)

नैथि बर' महासनमिलनीखौ इं 1925 माइथायाव कामरुप जिलानि रडियाआव खुंनाय जायो। बे जथुमायाव गुरुदेब कालिचरण ब्रह्मआनो दैदेनगिरि जानानै जथुमाखौ जाफुंसार होदोंमोन। बे मेलखौ आफादगिरि हिसाबै दैदेनदोंमोन जघुनाथ खाख्लारिआ। सभाराम ब्रह्म, जादब चन्द्र खाख्लारि, रबि चन्द्र कसारि, जगेन्द्र कसारि, सम्भु उजिर, गपाल उजिर, दुर्गा मौजादार आरो गोबां बै समनि मेलेमजिबिफोरा बे जथुमायाव हेफाजाब होदोंमोन। इं 1925 माइथायनि जथुमायाव आरोबाव गोदानै मोननै थांखि आजावबावो बेफोर थांखिफोरा जादों।

थांखि नं 1 : बर'फोर अमा फिनाय हुदाखौ होबथानाय जाथों। मानोना अमा फियोब्ला ननि सोरगिदिं जायगाया हाब्रु गेल गेल जायो आरो मोनामो, बेराम सोमजि होयो। अमा फियोब्ला मैगं-थाइंगं, माइ आबादफोरखौ फोजोबस्राडो।

थांखि नं 2 : गासैबो बर'फोरा ब्रह्म दोहोरोमखौ आजावनांगौ होन्नानै खावलायनाय जाथों। थांखिफोरखौ राइजोफोरा खौसेयै मदद होलायो।

नैथि बर' महासनमिलनीनि जथुमायाव आजावनाय थांखि 1नि गेजेरजों अमा फिसिनायखौ बिगियाननि आदबजों फिसिनो थुलुंगा होनाय जादों। नाथाय बेखौ थौले नोजोरजों बिजिरोब्ला गोरोन्थि साननाय सोमजिनो हागौ।

थांखि 2नि गेजेरजों आजावनाय थांखिया बै समनि बर' समाजनि खैफोद गोनां दुखुनांथाव थासारिखौ

नोजोर होनानै दोहोरमनि गेजेरजों बर' समाजखौ फोथानानै लाखिनांगौनि गोनांथिखौनो फोरमायदो आरो साफ्रोमबो सुबुंनो आध्यात्मिक गियाननि गोनांथिखौ रोखा नडाब्लाबो खेंसालियै फोरमायदों।

4. थामथि बर' महासनमिलनी खुंनाय (इं 1929)

थामथि बर' महासनमिलनी जथुमाया इं 1929 माइथायाव बंगाइगाउननि रौमारि होननाय गंसे बर' मैखोम गामियाव जादोंमोन। बै महासनमिलनीनि जथुमायाव गुरुदेब कालिचरण ब्रह्मा दैदेनगिरि हिसाबै बाहागो लादोंमोन। बे जथुमायाव मुंदांखा असमिया रायथाइगिरि आरो खन्थाइगिरि जेरै- अम्बिकागिरि रायचौधुरि, निल'मनि फुकन आरो गोबां बिथामोना बाहागो लाफैदोंमोन। गुरुदेब कालिचरण ब्रह्म, सतिश चन्द्र बसुमातारी, फोर्ला बाबाजी, मदाराम ब्रह्म, बिरेन्द्र नारायण मण्डल आरो गोबां बर' मेलेमजिफोराबो बाहागो लादोंमोन। बेनि अनगायैबो सदियानिफ्राइ लानानै जलफाइगुरिसिम गुबुन-गुबुन जायगानिफ्राइ गोबां बर' आरो गुबुन हारिनि मानसिफोरा बे जथुमायाव बाहागो लाफैदोंमोन। बेनिखाइनो बे जथुमाया मेहेरगोनां जादोंमोन।

जथुमायाव आफादखौ आफादगिरि महरै दैदेनदोंमोन जादब चन्द्र खाख्लारिया। बे महासनमिलनी जथुमायाव माखासे थांखिफोरखौ आज्ञावनाय जायो। बेफोर थांखिफोरा जाबाय-

थांखि नं 1 : अमा फिसानायखौ होबथानाय जाथों।

थांखि नं 2 : नायनो मोजां हिन्जाउफोरखौ बोनानै (गोसो गैयाब्लाबो) हाबा खालामनायखौ होबथानाय जाथों।

थांखि नं 3 : जौ संनाय आरो लौनायखौ होबथानाय जाथों।

थांखि नं 4 : दाउ-फारौ हाथारनानै इसोर सिबिनाय खान्थिखौ होबथानाय जाथों आरो ब्रह्म दोहोरमखौल' आज्ञावनाय जाथों।

थांखि नं 5 : बर' हिन्जाउफोरा हाथाइ जानायखौ होबथानाय जाथों।

बेनि अनगायैबो गुरुदेब कालिचरणा माखासे थांखि आज्ञावनो बोसोन होबावो। बेफोर जाबाय- इसोर सिबिनाय हाबाफोराव खाम, जथा, सिफुं दामनायखौ नागरनांगौ। कालिचरणा ओरैबादि बुडो- “इसोर सिबिनायाव बेफोर दामग्रा मुवाफोरखौ दामोब्ला इसोर सिबिनायाव गोसोआ दिदोम थाया आरो इसोर सिबिनायाव रंजानायासो बारा जायो। इसोर सिबिनायाव रंजानो मोना।”

बे थांखिखौ जाफुंहोनो आरो जौ संनाय, अमा फिसिनायखौ होबथानो थाखाय मोनसे मावथि हान्जा दानायनिबो बोसोन होयो।

खाम, जथा, सिफुडा बर'नि हारिमुनि गोनां आयदा आरो इसोर सिबिनायाव खाम, जथा, सिफुं दामालाबानो गुबुन समाजारि हाबाफोराव बेफोर दामग्रा देग्राफोरखौ बाहायनो हायो। बेनिखायनो बेफोर दामग्रा-देग्राफोरखौ ज्राब गारथारनाया मोजां जानाय नडा होन्नानै गुरुदेबा सान्दोंमोन। रुपनाथ ब्रह्म, सतिश

चन्द्र बसुमातारी, नेपाल चन्द्र ब्रह्मचारि आरो गोबाडानो कालिचरणनि बिब्दि थांखि आजावनो बोसोन होनायखौ मदद होयो।

थांखि बादियै मावथि हान्जाखौ दानाय जायो आरो मावथि हान्जाया गामि गामि हाबनानै जौ संनाय, फाननायखौ होबथायो, अमा फिसिनायफोरखौ बादा होयो। गुरुदेब कालिचरणा बर'नि गोरों सुबुंफोरखौ लोगोआव लाफानानै समाजनि गाञ्जि हुदाफोरखौ नागारनो खावलायदोंमोन। गुरुदेब कालिचरणनि मोजां रावजों बुजायनायाव गोबां बर'फोरा गाव गावनि अमा फिनानै ननि सोरगिदिं जायगाखौ लेथ्रा खालामनाय, बोलि होनानै इसोर सिबिनाय बायदि बायदि हुदाफोरखौ नागारनानै ब्रह्म दोहोरुमखौ आजावदोंमोन।

थामथि बर' महासनमिलनीनि जथुमायाव गाहाइयै मोननै गोदान थांखि आजावनाय जायो।

थांखि नं 2आव मुगैजाथाव नेम जैरे हिन्जाउ बोनानै नारा-नाथा हाबा खालामनायखौ फोसाबनायनि थाखाय थुलुंगा होनाय, सिख्लाफोरनो समाजारि रैखाथि होनाय। बे थांखिनि गेजेरजों थारैनो समाजाव हिन्जाउ आरो सिख्लाफोरनि फारसे मान होनाय, अननाय गियान सोमजिदों आरो थुलुंगा होदों।

थांखि नं 5नि गेजेरजों हिन्जाउफोरखौ हाथाइ-बाजाराव उदाडै बाजार खालामनाय एबा उदाडै बेरायनायनिफ्राय होबथानायनि थांखियानो जादों हिन्जाउ बोनानै नारा-नाथा हाबा खालामनाय हुदाखौ होबथानाय आरो फोसाबनाय। बेफोर थांखिया बै समनि थासारिखौ नोजोर होनानै गोरुबफलेहोनाय आरजाथाव थांखिमोन।

5. फोजोबनाय

गुरुदेबनि समाज फोसाबनाय नोजोरा जोबोरै गुवार आरो गोथौमोन। गोथौ सान्थौ गोनं मोनफ्रोमबो बिथिखौ लाफाजोबनाय गोखौं जांखिथाइमोन। बिथानि दैदेनगिरिनि आदब-सोलोआ मोनजोंबो रुजुजायि। बिथानि जांखिथाइनि फिथाइया दिनै गोदान समाजाव गोहोम गोग्लैदों। बिथानि सिमाडा नाथाय दिनै सुफुंजानांगौवा गोदान जौलैनि आखाइयावसो। रांखान्थि, सोलोंथाइ, राजखान्थि, हारिमु, राव-थुनलाइ बायदि बिथिडाव बैसोगोरा समाज महरै समाजखौ दानायव बिथानि नुलांनाय सिमांखौ आबुं खालामनाय गोदान जौलैनि आखाइयावनो दड।

दानि गोदान बर' समाजा मोनफ्रोम बिथिडाव जौगानायनि थाखाय हाबा मावनो बयबो जान्जि खाफ्रानांगौ आरो गुरुदेबनि आदब सोलोखौ संदानानै आवगायलांनंगौनि गोनांथि दं। रावनिबो सायाव लामा नायबाय थायालाबानो मोजां हाबायाव बयबो गावबा गावनि गोहोबादि आखाइ होनांगौनि सम सौबाय।

हेफाजाब लानाय बिजाबफोर

शरमा, देवेन्द्र नाथ. 1983. *गुरुदेब कालिचरण ब्रह्म*. असम साहित्य सभा.

बर', अजित. 2019 थामथि बिसान. *गुरुदेब कालिचरण ब्रह्म: सानसि आरो गोहोम*. मुस्रि जयन्त कछारी.